

東坡全集 卷十三

贈東林總長老

溪聲便是廣長舌，

山色豈非清淨身？

夜來八萬四千偈，

他日如何舉似人。

欽定四庫全書 東坡全集卷十三 宋 蘇軾 撰詩八十一首

嘉泰普燈錄卷第二十三

平江府報恩光孝禪寺(臣)僧 (正受) 編

內翰蘇軾居士

字子瞻，號東坡。

宿東林日，與照覺常總禪師論無情話，有省。黎明獻偈

曰：

「溪聲便是廣長舌，山色豈非清淨身。

夜來八萬四千偈，他日如何舉似人。」

【經文資訊】卅新續藏第 79 冊 No. 1559 嘉泰普燈錄

居士分燈錄卷下

雲間 心空 朱時恩 輯
同郡 心岫 王元瑞 閱

蘇軾（東林常總禪師法嗣）

嘉祐初，登進士直史館。

元豐三年，謫黃州時，佛印了元住歸宗，軾與酬酢妙句，烟雲爭麗。

自黃徙汝，因遊廬山，宿東林，與照覺常總論無情話，有省。黎明獻偈曰：

「溪聲便是廣長舌，山色豈非清淨身？」

夜來八萬四千偈，他日如何舉似人。」

又曰：

「橫看成嶺側成峰，遠近看山了不同。

不識廬山真面目，祇緣身在此山中。」

【經文資訊】卍新續藏第 86 冊 No. 1607 居士分燈錄

嘉泰普燈錄卷第二十四

平江府報恩光孝禪寺(臣)僧 (正受) 編

臨安府上天竺證悟圓智講師

台城人，族林氏。

年二十四剃染，依白蓮僊法師。

入室，問具變之道。

僊指行燈曰：

「如此燈者，離性絕非，本自空寂，理則具矣。

六凡四聖，所見不同，變則在焉。」

智不契。

後因掃地，誦《法華》，至「知法常無性，佛種從緣起」，始諭旨。白僊，僊然之。

自領徒以來，嘗患本宗學者囿於名相，膠於筆錄，至以天台之傳，為文字之學，南宗鄙之，乃謁護國此庵元禪師。

夜語次，智舉東坡宿東林偈云：

「也不不易，到此田地！」

庵曰：

「尚未見路徑，何言到耶？」

云：

「只如他道：『溪聲便是廣長舌，山色豈非清淨身。』若不到此田地，如何有這箇消息？」

曰：

「是門外漢耳。」

云：

「和尚不吝，可為說破。」

曰：

「却只從這裏，猛著精彩，覷捕看。若覷捕得他破，則亦知本命元辰落著處。」

智通夕不寐，及曉鐘鳴，去其秘畜，以前偈別曰：

「東坡居士大饒舌，聲色關中欲透身。

溪若是聲山是色，無山無水好愁人。」

持以告此庵。

庵曰：

「向汝道，是門外漢。」

智禮謝。

未幾，有化馬祖殿瓦者，求語發揚。智書曰：

寄語江西老古錐，從教日灸與風吹。

兒孫不是無料理，要見冰消瓦解時。

此庵見之，笑曰：

「須是這閻梨始得。」

宗門拈古彙集卷第四十三

古杭白巖嗣祖沙門 淨符 彙集

△南十三

眉山學士蘇軾居士字東坡（南十三東林總嗣）

參東林，論無情說法話，有省，乃獻投機頌曰：

「溪聲便是廣長舌，山色無非清淨身。」

夜來八萬四千偈，他日如何舉似人。」

上竺智謁護國元，舉前頌且云：

「也不易，到此田地。」

元曰：

「尚未見路徑，何言到耶？」

智云：

「『溪聲便是廣長舌，山色無非清淨身。』

若不到此田地，如何有者個消息。」

元云：

「是門外漢耳！」

智致疑，通夕不寐。

乃曉鐘鳴，去其秘蓄。

乃別前頌云：

「東坡居士太饒舌，聲色關中欲透身。」

溪若是聲山是色，無山無水好愁人。」

持以告元。

元云：

「向汝道，是門外漢！」

幻寄稷云：

上竺者漢，思量了一夜，却寐語。

東坡門外漢，者漢未及門。

此菴云：「向汝道，是門外漢！」

且道是賞伊罰伊，莫錯會好。

天然是禪師語錄卷第二

嗣法門人今辯重編

豎拂子云：還見麼？見底不是色。

以拂子擊案云：還聞麼？聞底不是聲。

既不是聲色，又是箇什麼？

昔東坡居士云：

「溪聲盡是廣長舌，山色無非清淨身。」

夜來八萬四千偈，今日明明舉似人。」

看此偈可謂攪長河為酥酪，變大地作黃金。

後來有箇長老卻云：

「東坡居士太饒舌，聲色關中欲透身。」

溪若是聲山是色，無山無水好愁人。」

且道具箇什麼眼，便恁麼道？不見道：荊棘叢中著腳

易，月明簾外轉身難。你若識得者箇長老，方纔識得雷峰。

雷峰不曾向你紫羅帳裏撒珍珠，你擬什麼處構，切莫顛預！

【經文資訊】嘉興藏第 38 冊 No. B406 廬山天然禪師語錄

彌陀經疏鈔演義定本卷一

雲棲 古德法師 演義

門人 慈帆智願 定本

觸目菩提者，頭頭皆是，法法皆真。

明明百草頭，明明祖師意。

東坡云：溪聲盡是廣長舌，山色無非清淨身。

【經文資訊】卍新續藏第 22 冊 No. 0427 阿彌陀經疏鈔演義